

Restrukturiranje zajedničke policije u Kantonu 4

OHR i Misija Ujedinjenih nacija u Bosni i Hercegovini (UNMIBH) pozdravljaju ključni korak naprijed koji je tokom proteklih nekoliko dana napravljen u uspostavljanju multietničkih policijskih snaga u Kantonu 4. Ovaj korak je u skladu sa strategijom OHR-a za Kanton 4, koja ima za cilj povećanje nivoa implementacije u Zeničko-dobojskom kantonu u svim oblastima od značaja, kao i sa politikom UN IPTF-a u pogledu zapošljavanja pripadnika manjina u policiji, na što su se federalni partneri obavezali u Bonn-Petersbergu prije gotovo tri godine.

Nakon što je prošlog četvrtka 30 policajaca Hrvata započelo sa radom u Ministarstvu unutrašnjih poslova Zeničko-dobojskog kantona, u Žepču je, u prisustvu Zamjenika Visokog predstavnika Jacques Paul Kleina i Komesara IPTF-a Detlefa Buwitta, kao i kolektivnog rukovodstva Kantona i predstavnika lokalne vlasti, održana inauguracija multietničkih policijskih snaga, u čijem sastavu se nalaze 93 policajca. Do uspostavljanja zajedničke policijske uprave, do kojeg treba doći najkasnije 13. jula 1999. godine, nove policijske snage u Žepču pokriće područje općina Zavidovići i Maglaj, koje su ranije pokrivala hrvatske policijske snage u Žepču. UN IPTF će imenovati savjetnika za policijsku upravu u Žepču u cilju pružanja pomoći u uspostavljanju multietničkih policijskih snaga koje će u potpunosti funkcionirati.

Takođe pozdravljamo uspostavljanje multietničkih policijskih uprava do kojeg je juče došlo u Zenici i Kaknju, a što predstavlja dio ovog pristupa po principu korak po korak. Ovo su značajni pomaci kojima će se povećati sigurnost u cijelom Kantonu za sve stanovnike.

OHR i UNMIBH izražavaju odlučnost da uklone one koji pokušaju da izmijene ove konstruktivne rezultate, postignute na osnovu plana restrukturiranja kojeg su 26. marta usvojili Ministar unutrašnjih poslova – Bošnjak, i njegov zamjenik – Hrvat.